

che dovessero star di bona voia che, subito havuti li figlioli, non li mancheria di soccorso.

205 Da poi disnar, fo Pregadi per scriver a Constantinopoli et in Alemagna.

Da Constantinopoli, fo leto le lettere di oratori et sier Francesco Bernardo baylo. Del zonzer li et li honori fattoli, et esser stà da li bassà, et colouii hauti insieme, et poi basar la man al Signor, et dato li presenti a tutti. I quali bassà, et Aias et Sinan et Imbrain li ha ditto di la paxe fatta con l'imperator, et darli tanti danari, et fatta senza saputa del Gran signor; et loro oratori giustificò non si ha possuto far di men, l'imperator era zonto potente in Italia, et nui strachi di la guerra; *tamen* volemo esser sempre uniti col Signor et mantener la nostra bona paxe. Scriveno come domino Alvisè Griti havia hauto lettere di Hungaria, del re vayvoda, di 16 zorni fa, li avisava il zonzer di l'imperator in Ispruch, et che'l preparava exercito per farli guerra. Concludeno, li bassà ha gran sospetto su la Signoria nostra etc.

Et nota. Prima fo al Signor l'orator Mozenigo solo con li presenti, poi il bailo sier Francesco Bernardo con li presenti, solo.

Item, di sier Piero Zen orator solo fo leto lettere di Si duol che havendo anni 73 sia stà fato sì puoco conto de lui, che le lettere scritte sier Thomà Mozenigo non ha voluto mostrargliele, et è in zifra con scriverli lezi sotto: et sopra questo scrive longamente di le operation sue, et non meritava questo il suo ben servir; lauda sier Francesco Bernardo baylo, qual si porterà ben, et mandando di questi canuti le cose di la Signoria passerà ben.

Di sier Francesco Bernardo baylo. Scrive solo l'audientia hauta da li bassà, et poi dal Signor, et altre occorrentie zerca il baylazo.

Fo provà li patroni di le galie di Alexandria, et tutti do rimaseno

Sier Jacomo Marzello qu. sier Piero . . . 193. 0
Sier Francesco Zen, qu. sier Vincenzo . . . 194. 0

205* Fu posto per li Consieri una taia a Verona, hessendo stà morti Zuan Poeta, Bortolamio Isnelin et Nicolò Bellinun da alcuni incogniti, che quelli acuserà li mandatarii habbino lire 2500, et si uno di quelli accuserà sia asolto et habbi di taia lire 1500, et sapendo poi li delinquenti sia dà autorità al prefato podestà di Verona di ponerli in bando di terre et

lochi, con taia lire 1500, *ut in parte*, et confiscar i soi beni. Ave: 153, 0, 7.

Fu posto, per li Savii del Conseio, Terraferma et Ordini, una lettera a li oratori nostri a Constantinopoli, in risposta di soe, et laudandoli di la risposta fatta a li magnifici bassà che la paxe havemo fata siamo stà sforzadi a farla; non però che mai semo per far cosa contra la bona paxe havemo con il Gran signor, qual volemo mantener. Et li avisemo come il Christianissimo re ha hauto li soi fioli, et dato li danari. *Item*, di Alemagna, l'imperator è in Augusta, fa diete per le cose lutheriane.

Fu posto, per li Savii, una lettera a sier Nicolò Tiepolo el dotor orator a l'imperator, con avisarli havemo hauto le sue lettere, et prima li avisemo haver lettere da Constantinopoli di l'orator nostro andato li, come non si fa armata nì exercito terrestre, ma attendeno a le feste per la circoncision di fioli. *Item*, li scrivemo, del castello de Istria del Taxis, come havemo offerto darli li danari dia haver da la Cesarea Maestà.

Fu posto, per li Consieri Cai di XL et Savii sopraditti, havendo il Christianissimo re mandato uno suo zentilhomio di camera con lettere et con la nova de la recuperation de fioli, et quelli esser passate ne la Franza, et il venir di la serenissima regina sua consorte, pertanto li siano donati scudi 300 dal sol. Ave: 191, 26, 2.

Nota. Questo è uno milanese nominato . . . qual va Ferrara et Mantoa poi, con lettere del re con lo instesso aviso.

Fu tolto il scrutinio di un savio a Terra ferma che manca, justa la parte. Tolti . . . , rimase sier Piero Morexini, fo avogador et sinico di terra ferma, qu. sier Lorenzo, di 5 balote. Il scurtinio sarà scritto qui avanti.

Scurtinio di un Savio a Terraferma. 206

† Sier Piero Morexini fo avogador et sinico di terraferma, qu. sier Lorenzo 145. 77
Sier Marco Barbarigo, qu. sier Bernardo, fo del Serenissimo principe . 112.115
Sier Hironimo Arimondo el proveditor sopra le legne, di sier Andrea . . . 69.156
Sier Marco Trun qu. sier Antonio . . . 121.110
Sier Francesco Morexini el dotor, qu. sier Gabriel 108.113